

如臯縣續志卷十四

名蹟

各人所至山川增色子陵釣臺蘇公赤壁峻節高風頑廉懦立奇思壯采天空海濶景仰前徽音塵不隔續名蹟

園

文園邑人汪之珩築綠淨園邑人汪爲霖築

汪承鏞兩園記云余家如臯縣之豐利場雍正初曾大父澹菴公始治園於所居西北隅曰文園前帶闌闔後枕鹽渠袤可五百步廣三百步繕以崇墉甃以文石門當其東入門爲石徑爲磴道磴盡爲念竹廊修篁夾道

如臯縣續志

卷十四

名蹟

一

蔽日引風能移寒燠永却炎熇循廊曲折而南接以短垣有朱藤一陀地徐起矯如虬龍擎空白丁香繡毬二本大皆拱抱高出垣上其下有屋狀肖舟爲紫雲白雪仙槎適北循牆數十步而西則岡阜起伏山茱截業洞壑玲瓏引人人勝上爲韻石山房飛甍危檻如坐閬苑仙境古木怪石逴態於前旁一徑引而東有室豁然開朗題曰假年課子讀書堂蓋曾大父於雍正乙卯寢疾夢之高山謁文昌文昌曰汝行善宜延壽一紀顧左右遣歸遽然而悟疾遂愈故以是名堂而並祀文昌其中園之通命曰文以此回軒八達竹木清瑟芭蕉數本質竝蒼老曾大父用是課大父璞莊公讀書於此焉迤東

畫屏迤南爲一枝龕龕大僅可一筵覆若團焦其時
老桂輪囷昂藏獨立秋馥當風遠徹里閉翦伐之戒於
今四世其北高屋數椽屹出山巔與桂相望則所謂小
山泉閣也疊石作山穿土得泉一泓澄碧赤鱗百頭泳
遊荇藻中令人有濠濮間意中爲燠館輔以曲房頗黎
嵌空簾幙相屬冬日一觴一詠往往於此作消寒會焉
自此而南而西高樓百尺疎窗四啟者爲浴月樓闌楹
壯麗隔江諸山遠翠迎人煙霞暹變朝異夕殊畢呈几
席間下鑿巨池圍以石闌勝以虹梁中植千葉芙蓉旁
蒔蒲柳桃李之屬鳧雁翔集盪摩天光秋夏之交素月
當空弄影波面與客坐對其間泠然善也是爲一園絕

如臯縣續志

卷十四

名蹟

二

勝池北得支徑折而西爲讀梅書屋繞簷梅花百餘樹
花時讌客其下雖嚴寒恆流連不忍去東行數十步爲
碧梧深處梧桐四株隔立交柯清陰滿庭濃翠若滴疊
石爲臺拾級上可容十許人畜二鶴其中微風吹拂遠
籟自生與鳴臯聲時相應擊場置屋遊者至此爲偃息
所焉因顏曰鳳棲山節又西而北爲歸帆亭則園之後
門也佔帆漁艇往來如圖畫亭瀕河河北爲綠淨園園
之築後於文園六十餘年其坎方有竹香齋闢牖南向
以迎冬旭外庭軒敞而內室樸雅絕塵修竹拂簷致爲
深窈由竹香齋折而東爲藥闌種紅藥畝餘玉盃金帶
佳品甚夥其旁連畛相望皆牡丹也每歲花開爛若雲

錦又東南爲古香書屋綠蔓緣於門棖層蘚蔽其履
有屋四楹貯書萬軸則我祖璞莊公手澤之所遺也庭
隅黃梅一株幹如削鐵邑冒氏水繪園中舊物迤西行
折而北爲一簣亭上山戴石重巖再成高可凌空爰構
亭其巔東望紫琅南望軍山羣峯遠近隱約可見江光
海色在有無中先大父嘗攜湘蘭數百本植之陂陀有
朱色紫色蜜色碧玉色者後稍萎補以宛陵陽羨所產
二十年來蕭艾塞徑坡間惟麥門冬耳昔先大父自粵
西請假歸闢菑地於鹽渠之北築垣濬池蒔花木構亭
館以奉板輿議合兩園爲一建橋以通往來爲忌者所
忌事遂中輟時洪太史稚存至講揚州艤棹來訪見而

樂之取韓昌黎綠爭不可唾之句書而榜之門由是終
先大父之世無所增飾而園之圖以此止昔李文叔作
洛陽名園記其於興衰之際未嘗不感慨言之由今觀
之信有然矣當先大父叔闢是園其時家有餘資投轄
留賓豪而能給且吾里當通海之衝舟車之所萃集四
方士大夫過訪者文讌無虛日所傳甲戌春吟文園六
子唱和詩至今猶稱韻事歲己巳先大父自山左乞養
旋里徜徉林下者十有四年遊迹所至遠或數百里而
皆以文園爲菟裘因倣唐段柯古漢上題襟例類次唱
和諸詩爲文園題襟集壬午先大父棄養後家難屢作
集竟散佚惟戊寅歲季君學耘所作文園圖十幀綠淨

園圖四嶺在隱李贊皇愛其平泉一石一木舉以戒其子孫未幾南遷而平泉已爲他人有况以余之不才其能終有此園乎綠淨旣屬之於外文園又荒不可治百餘年來一盛一衰其可問耶夫川嶽流峙不敝於窮壤猶不免陵谷之變遷區區之園其不夷爲邱隴鞠爲茂草者幾希亦惟文字丹青以永其傳可耳予以薄宦需次厯下退食之暇時展此圖以紓羈旅之思而又得當時賢士大夫名章俊句以歌咏之所得豈不多哉爰述而記之並乞羣賢題詠於右一以志余不克負荷先業之懼一以見諸君子惠我之雅焉

襟隄園在縣東一百十五里邑人曹鎧築南接虹隄東瞻如臯縣續志

卷十四

名蹟

四

蟻阜春潮夕月雅稱異觀

日涉園在東漢河南湯家莊湯思齊築孫俊修

京江李承霖詩春明隔座覘風格十載光陰過駒隙名園一水接西東衡宇相望今咫尺主人未歸客許遊門無呵禁任所適我因避地此卜鄰家室狃安來往劇賞花看竹習門徑等引無煩喚臧獲金尊爲倒費招邀信手還堪展圖籍商邱氏胄真賢哉堂構相承綿世澤經營作室旣底成歲久鳩工更損益嘉樹參天石疊雲略約橫波鮮迎屐藏書之處倍開拓書添翻覺庭宇窄主人數厯三十春萬事胸中善籌策園中布置特小試啟後承先深愛惜舊聞有圖在行篋遊宦相隨未嘗釋名

流澗... 富玲瓏妙手裝潢積盈冊征塵歲杪昨初...
簡相邀論主客識面欲稀是昔年鬚鬢相看今已白酒
闌吸茗爲啟圖佳句纍纍真絡繹圖中題者祇神遊我
獨親來踐苔跡就園觀圖眼更明傾吐終朝快胸膈因
君此圖轉自歎念我無家異疇昔江城昨夜賊蹤退首
邱猶冀存故宅入門瓦礫積如山狐兔縱橫競跳躑先
人做廬竟何在往返空勞數潮汐自今長作寄居人仁
里相從永晨夕翻恐君今偶息肩未必鄉園歛鵬翻後
先守郡治軍書羽檄如飛馳傳驛儲胥有賴市無驚萬
室歌功聲蹟蹟往時仕績在人口此日焉能坐安席時
艱方要幹濟才到處望作甘棠伯一身憩舍不足戀廣

如臯縣續志

卷十四

名蹟

五

廈人思萬門闢名高已竝龕赭山節峻還同鬱林石有
山有水卽園林天地爲廬資擘畫與君暫聚畫圖中流
連莫遣年光擲

水邨園在潮橋鎮北二里邑人朱憲別業其子華克承親
志經營落成園中疊土築山古木新篁鄉人往往遊憩焉
是亦園在汝河西南邑人曹錦章築

自記丙午仲夏余與弟博齋移居茶塢西南之平安鄉
卽其宅西隙地鑿荷池築柳隄思構數椽於其間爲遊
息地而未暇也觀者見池之曲直相間也隄之長短相
生也問余將爲園乎余戲應之曰是亦園也客曰有亭
有臺有榭有樓閣有山石橋梁有竹木花卉始各爲園

有高下有虛實有參差有整齊有曲折變化各抱地勢
鉤心鬪角之妙始成爲名園故古今之名園多創於名
人或及身而成或數傳而成成則名筆可繪之以入畫
記之以傳世今指數畝闕田而曰是亦園也將執尺素
以示人曰是亦書也有不笑其無實而盜名者乎且子
之爲斯言也戲之乎抑仿名園爲之乎欲繪園而未知
誰從乎不然則是匠心獨運自成一案經營慘澹而未
就也明矣余聞之仰而笑俯而思身居僻壤園之爲園
目未嘗見也所見者前人名園記耳執記以爲園猶按
圖以排陣開合奇正紙上能畢傳乎且夫人有爲園之
心因思爲園之法法立而園成今其人往矣無論百年

邱墟故址難尋卽使巋然獨存名工可繪而山水有正
假地勢有廣狹人心之好尙有異同茲必規其意撫其
形似則爲優孟之衣冠否則爲東施之顰笑其貽譏大
雅一也人云亦云固爲生平所不喜我用我法又恐才
力之未能如是者數月一日觀先輩論文謂作文如作
室須先立間架然後布置點綴歷歷如畫繩墨不廢斧
鑿無痕始恍然而得作園之法也因知古之爲園者必
其能文者也雖能文者不盡爲園而園名一世者未有
不文各一世者也而不然者非野卽俗於是掩卷而起
以作文之法作園繞荷池步柳隄相度其前後顧盼其
左右設一園之地於目中而憑空結撰焉若者爲亭若

者爲榭若者爲臺若者爲樓閣虛造其勢徐有其體
虛飾區額辭不泛設焉紆徐以爲妍喬梁旁通焉卓犖
以爲傑山石高聳焉嵯峨其風神橫生其機趣修竹喬
木名花異卉互相掩映令人應接不暇焉宜高者高之
宜下者下之實者虛之虛者實之平者參差之散者整
齊之直者曲折變化之大氣鼓鑄渾灑流轉之文賦而
法立焉不愜心者改之如是者又數月然後夢寐之間
不啻園功畢成偕第友親朋同遊其中見有坐地南伏
疏榻者有過橋而上枕流處者由枕流而上翼然亭屨
聲橐橐登曲樓眺遠者有北行而至三友齋東觀梅西
樵松看竹不問主人者離齋而過一方亭曲水山房者

如臯縣續志

卷十四

名蹟

七

繞山房穿路亭而入瀟湘館者靜觀小米青山者之東
者循牆而往落虹所翻紅館徘徊楊柳岸聽飛鳥鳴聲
之上下之北者步曲廊瞻草堂登土山望南園之憑欄
觀花者臨流釣魚者獨立者並坐者抱石眠者調鶴鬪
草陶然譁然與山前之書聲遙遙相應者醒而誌之幾
忘向者之爲虛構也由是購木石栽花草依所構之局
率梓人瓦人坊者傭工者營造焉遲之五載而告成置
酒而樂之對第友而述之衆問其名余曰無題之詩天
籟也無譜之棋國子也引經據典挂一漏萬不如渾舍
包舉三諸所有正以實諸所有也余以文爲園不以園
爲園其是園與否一聽來遊者隨其所見而意會之可

也何以名爲眾未及對余第忻然曰有是哉見文者謂
之文是亦文也見園者謂之園是亦園也名之是亦可
乎余笑而從之設其門於隄南而顏其上且默會其意
之別有在也

似園在車馬湖西邑人吳文杰築內十八景有似園自記
其自題云名園曠覽幾經年小築湖西地自偏勺水卷山
聊點綴清風明月任留連閱臨畫法兼書法偶結詩緣與
酒緣將就林泉無勝概數竿修竹護雲煙

書室

城南書塾同治十二年修

按書塾在古柏園西胡夢白侍御讀書處歲久漸圯同
人僦居集資重修春秋佳日以爲聯吟之地

藤薇室在城西百歲巷觀察徐瀛僑寓所築

按室前有紫藤薇各一株數百年物也瀛奉檄團練寓
臯時築室其下題云世事都如雲過眼人生莫負月當
頭置身香裏心常靜築室城中境亦幽杏發梅開花甲
子燕來雁去鳥春秋半閤半仕投簪綬爲有林泉得自
由蠻觸憑他小鬪爭一卷一勺總忘情牆低許看鄰家
樹屋敞還聞野外鶯酒後不知花已放人來忽惹鳥先
驚連朝底事多微雨屈指銀河應洗兵瀛丙申進士由
庶常改知縣游陞觀察刻有藤薇室詩文集二卷行世

別業

樓雲別墅在潮橋鎮北吟秋別業在潮橋鎮東均邑人朱夔築

曠觀樓在潮橋北邑人朱霖築

墓

孝子徐文楷墓在徐家灣東

孝子馬中騶墓在東門外先農壇東

義塚一在雙甸鎮洋莊北舊義塚旁尤震設今添田三十畝一在雙甸鎮東北費義塚旁尤霖設今亦續添田畝俱於道光年間請示勒石一在曹家埠南田十九畝零曹鎧設一在徐家莊田十畝徐鑑設一在東南安居莊田十畝陳雲生熊文田等設一在東鴛鴦橋田六畝五

如臯縣續志

卷十四

名蹟

九

分僧悟堂豐圮設一在元興鎮西北田十二畝朱霖設一在石莊西萬家岱田五畝零常郡公善堂公設一在岔河南顧家莊田二十畝又岔河南龍泉菴東北田二十畝又岔河鎮藥師菴後田四畝觀音堂東田三畝均湯世質設